

Skýrsla fræðslunefndar Sjúkraliðafélags Íslands starfsárið 2011 – 2012

Í fræðslunefndinni sitja:

Birna Ólafsdóttir, formaður, SLFÍ
Birkir Þór Högnason, ritari, Vestmannaeyjadeild
Anna Björgmundsdóttir, Vestfjarðardeild
J. Eygló Benediktsdóttir, Reykjavíkurdeild

Á síðsta þingi var Birkir kosinn varamaður fræðslunefndar, en allir nefndarmenn sitja fundi nefndarinnar. Fræðslunefndin hélt fjóra formlega fundi, auk samskipta á netinu. Fundirnir voru allir haldnir í húsnæði SLFÍ, að Grensásvegi 16 og landsbyggðarfulltrúar tengdir í gengum síma.

Verkefni fræðslunefndar voru að mörgu leiti hefðbundin á starfsárinu en þau helstu voru eftirfarandi:

- **Sí- og endurmenntun sjúkraliða**
- **Kynning á Sjúkraliðafélagi Íslands fyrir sjúkraliðanema í framhaldsskólum**
- **Trúnaðarmannafræðsla**
- **Vinnustaðnámssjóður**
- **Íslandsmeistaramót iðn-og verkgreina**
- **Afgreiðsla erinda**

Sí- og endurmenntun sjúkraliða

Að vanda var boðið upp á fjölmörg námskeið í sí- og endurmenntunarmiðstöð sjúkraliða, Framvegis. Helstu nýjungar hjá Framvegis eru að nú er boðið upp á fleiri námskeið í fjarkennslu fyrir sjúkraliða. Sífelld fleiri sjúkraliðar notfæra sér þessa þjónustu og taka námskeiðin heima hjá sér í gengum tölvutengingu. Gæði þjónustunar eru orðin meiri, betri búnaður og fleiri kennarar/leiðbeinendur tilbúnir að taka þessa tækni í sína þjónustu. Aukning hefur verið í fjölda kennslustunda á námskeiðum sjúkraliða og sífelld er boðið upp á ný námskeið og vinsæl eldri námskeið endurtekin. Í síðustu stofnanasamningum sem gerðir voru í tengslum við kjarasamninga félagsins geta sjúkraliðar á mörgum stofnunum bætt við sig launaþrepum með því að taka fleiri starfstengd námskeið. Eftirspurnin eftir námskeiðum hefur því aukist mikið í kjölfarið og er reynt eins og kostur er að uppfylla hana. Nú er verið að undirbúa haustönnina og verður boðið upp á fjölbreytt námskeið að vanda.

Námstoðir sem staðsett er á Akureyri hefur einnig boðið upp á nýjungar í námskeiðum og sjúkraliðar hafa verið duglegir að sækja sér símenntun þar. Fræðslunefndin þakkar bæði Framvegis og Námstöðum fyrir samstarfið á síðasta starfsári.

Kynning á Sjúkraliðafélagi Íslands fyrir sjúkraliðanemum í framhaldsskólum

Formaður fræðslunefndar og formaður ungliðadeildar SLFÍ lögðu land undir fót og heimsóttu nokkra skóla á starfsárinu. Auk þess koma formenn landshlutadeildanna til að kynna starfssemi deildanna á hverjum stað. Á síðasta starfsári var Verkmenntaskólinn á Akureyri heimsóttur, Menntaskólinn á Ísafirði, Fjölbrotaskólinn í Breiðholti og Framhaldsskólinn í Vestmannaeyjum. Í þessum heimsóknum gefst tækifæri á að kynna Sjúkraliðafélagið og fyrir hvað það stendur og svara spurningum sjúkraliðanema.

Trúnaðarmannafræðsla

Námskeið fyrir trúnaðarmenn eru sífelld í gangi. Fjölmargir trúnaðarmenn hafa útskrifast með þau sex stig sem í boði eru á vegum BSRB og ASÍ. Áfram verður boðið upp á fræðslu svo lengi sem eftirspurn félaga verður eftir námskeiðum. Ástæða er til þess að hvetja alla trúnaðarmenn félagsins til þess að sækja þessi námskeið sér til gagns í sínum störfum sem trúnaðarmenn.

Vinnustaðanámssjóður

Á síðasta starfsári var unnið að drögum á frumvarpi til laga um vinnustaðanámssjóð. Þessum sjóði er ætlað að jafna kostnað fyrirtækja og stofnana af vinnustaðanámi og starfsþjálfun á vinnustað, sem er skilgreindur hluti af starfsnámi skv. aðalnámskrá framhaldsskóla.

Markmiðið er að stuðla að eflingu vinnustaðanáms og starfsþjálfunar og auðvelda nemendum að ljúka tilskildu námi. Nú þegar hefur verið úthlutað úr vinnustaðanámssjóðnum og sóttu allmargar stofnanir er hafa sjúkraliða í vinnustaða- og starfsþjálfunarnámi um styrk til sjóðsins. Vonandi er þessi sjóður kominn til að vera það auðveldar nemendum og stofnunum að hafa nemendur í vinnustaðanámi.

Íslandsmeistaramót iðn- og verkgreina

Í mars s.l. tóku sjúkraliðanemar í fyrsta skipti þátt í Íslandsmeistaramóti iðn- og verkgreina. Þessi keppni á sér talsverða sögu hér á Íslandi og erlendis meðal iðnaðarmanna. Þetta var í fyrsta skiptið sem BSRB félagar þaka þátt í slíkri keppni. Skipulagningin var í höndum fræðslunefndar og framkvæmdarstjórnar félagsins, auk brautarstjóra keppnisskólanna. Til þátttöku fengust fjögur tveggja manna lið. Eitt frá Verkmenntaskólanum á Akureyri, eitt frá Fjölbrautaskólanum í Breiðholti og tvö lið frá Fjölbrautaskólanum við Ármúla. Keppninni fylgdi talsverður undirbúningur og umsvif. Sjúkraliðar tóku að sér þjálfarahlutverkið fyrir sjúkraliðanemana, ásamt tveimur tveggja manna dómarapörum, sem dæmdu verkefnið. Í hlutverki sjúklinga voru einnig sjúkraliðar. Keppnin var haldin í Háskólanum í Reykjavík og stóð yfir í tvo daga og var keppt í 20 greinum. Tvö þúsund grunnskólanemar heimsóttu keppnina fyrri daginn og var stór hópur sjúkraliða sem tók á móti þeim og kynnti fyrir þeim sjúkraliðastarfið og dreifðu bæklingum og endurskinsmerkjum. Einnig sáu sjúkraliðar um að veita fyrstu hjálp, ef um einhver óhöpp yrðu hjá keppendum. Þetta verkefni þótti takast afar vel og er vonandi komið til að vera fastur liður hér eftir hjá félaginu. Keppnin er haldin annað hver ár og verður næst 2014.

Afgreiðsla erinda

Nokkur erindi bárust nefndinni til afgreiðslu, sem ekki verða rakin hér.

Ég vil að lokum þakka nefndarmönnum í fræðslunefnd félagsins fyrir vel unnin störf á síðasta starfsári með ósk um að ný og spennandi verkefni bíði fræðslunefndarinnar á næsta starfsári.

Með félagskveðju

Birna Ólafsdóttir, formaður fræðslunefndar SLFÍ